

欽
定
全
唐
文

欽定全唐文卷七十四目錄

文宗六

定常參官書罰勅

令王智興安撫棣州勅

定銓司注擬例勅

罷海陵監牧勅

免溫造等罰錢勅

賜義成軍節度使涼國公李聽立德政碑勅

賜李聽勅

暫停嶺南選使勅

處分楊虞卿勅

處分斷裂制勅勅

定臺官供奉官道遇儀制勅

誅興元亂兵後加恩將吏勅

錄越王貞子孫勅

專責令史簡點選人文案勅

令李踐方充西川宣撫使勅

釋鄧晟等禁繫勅

雨雪賑濟百姓勅

賑恤蘇湖兩州勅

賜李德裕立德政碑勅

賜段凝勅

又賜段凝勅

賑恤諸道旱災勅

停忌日舉奏刑獄勅

禁私請賞設錢物勅

追收江淮諸色人經紀本錢勅

暫停吏禮兵三部選舉勅

聽諸司營造曲江亭館勅

誅王涯等勅

以旱停南郊勅

條流僧尼勅

罰鄜坊節度使蕭洪俸料勅

選皇太子妃勅

賜尚書省本錢勅

重錄已駁選人栗錯等勅

準臺奏國忌日依前例勅

賜裴度御札

答裴度辭官表批

答裴度辭官第二表批

答裴度辭官第三表批

答劉禹錫同州刺史謝表批

莊陵禮成優勞德音

平李同捷德音

賑卹諸道水災德音

冊立皇太子德音

欽定全唐文卷七十四

文宗六

定常參官書罰勅

文武常參官承前朝參不到臺司皆據品秩書罰其中班位雖同俸入懸隔一例書罰事未得中宜自今已後檢點不到據所請料錢每貫罰二十五文其疾病爲衆所知者不在罰限餘任準臺司往例處分

令王智興安撫棣州勅

如聞招討棣州計日降下賊收百姓多在城中時方春農

必多餒迫歸降之後宜委智興據戶口人數節級賑賜使各安生業便以度支供軍斛斗數內充如失家業者仍以空閒屋居田地逐便安存

定銓司注擬例勅

都省所執是格銓司所引是例互相陳列頗似紛紜所貴清而能通亦由議事以制今選已滿方此爭論選人可哀難更停滯其三銓已授官都省落下者並依舊注重與團奏仍限五日內畢其中如官超一資半資以今授稍優者至後選日量事降折尚書侍郎注擬不一致令都省以此

興詞鄭綱丁公著各罰一季俸東銓所落人數較少楊嗣復罰兩月俸其今年選格仍分明標出近例有可行者收入格不可者於格內書破則所司有文可守選人無路俸求

罷海陵監牧勅

海陵是揚州大縣土田饒沃人戶衆多自置監牧已來或聞有所妨廢又計每年馬數甚少若以所用錢收市則必有餘其臨海監牧宜停令度支每年供送飛龍使見錢八千貫文仍春秋兩季各送四千貫充市進馬及養馬飼見

在馬等用其監牧見在馬仍令飛龍使割付諸羣牧收管
訖分析聞奏

免溫造等罰錢勅

事出非常臺有妖賊官曹備警亦謂慮周即合待罪朝堂
候聽處分量罰自許事涉乖儀溫造姚合崔宜等各罰一
月俸所請罰錢宜並放

賜義成軍節度使涼國公李聽立德政碑勅

卿代光榮戟寄重旌麾集勲庸於一門統兵農於四鎮政
經允洽智略宏宣勤事累朝忠誠一貫今滑臺雄郡白馬

古津控扼洪河密邇清洛南并鄭圃旁帶潁川田疇之詠
繼聞萑蒲之徒已化國僑昔美今則嗣之眷言休嘉每用
懷想據守義所奏大將及三軍官吏僧道耆壽百姓等感
卿惠政咸請立碑翰林學士宋申錫學識優深文詞雅贍
已令撰述必盡功庸刊石旌賢庶諧朕意想當知悉春寒
卿比平安好遣書指不多及

賜李聽勅

卿勲德承家麾幢統鎮功宣武略化洽政經軍令肅於藩
方吏理惠於黔庶芳猷克茂德業彌彰羣黎三軍上請刊

石聿垂令問以示後來眷言休嘉良多詠歎翰林學士宋
申錫文師風雅學洞典謨意欲該詳俾其纂述勲庸真紀
政術畢書足慰人心無慙峴首待詔侯丕草隸久工便令
繕寫今故賜請想當知悉秋涼卿比平安好遣書指不多
及

暫停嶺南選使勅

嶺南選補雖是舊制遠路行李未免勞人當處若有才能
廉使宜委推擇待兵息事簡續舉舊章其南選便可更停
一二年

處分楊虞卿勅

三司推勘吏部踰濫官事其間要切節目皆如臺案李實
過狀稱楊虞卿奴受錢三百千勘是前年虞卿察知自送
府縣奴已決責錢亦納官又稱送錢并買婢等事悉無證
據但虞卿兩年專判曹務僞濫六十餘人連甲圖空近日
無例遂令祿位受制胥徒雖能續自舉明終失從前鈐轄
況勘官知僞久不公論隱闕報銓每將私用公私且乖於
較下事理固難於守官宜停見任餘準前勅處分

處分斷裂制勅勅

應中書門下尚書省二十四司制勅及勅甲等近日檢報多稱斷裂無憑勘覆以此之故踰濫大行應從前制勅甲等所有斷裂者宜各委本司並重黏背其中書門下仍取本押舍人給事中及甲庫官本司吏令尚書省委本司郎中甲庫官本行令史同署名印所斷裂縫扶尾後云某甲勘卷若干縫斷裂亦同印署新舊背縫並具年月卷第印署如庫官令史考滿日須據實交點已後檢報稱有斷裂甲庫官及本行令史節級處分

定臺官供奉官道遇儀制勅

憲官之職在指佞觸邪不在行李自大侍臣之職在獻可替否不在道路相高並列通班合知名分如聞喧競亦已再三旣招人言甚損朝體其臺官與供奉官同道聽先後而行遇途即祇揖而過其參從人各隨本官之後少相辟避勿信衝突又聞近日已來應合導從官事力多者街衢之中行李太過自今後傳呼前後不得過三百步

誅興元亂兵後加恩將吏勅

乃者蠻寇入犯蜀川令興元召募一千人隨事防遏雲蠻旣退賞設放歸事理之間亦爲得所奸臣犯紀戕害元戎

遂擇新帥委之窮竟果副朕意盡誅羣凶八百餘人一時
梟斬并諸叛將同日誅夷省狀念功嗟賞何極其衛志忠
已下將吏等委溫造節級分付訖聞奏王景延等以李絳
遇害時皆能輕身徇節奮不顧生宜委中書門下即與褒
贈其王景延仍與一子官兼委溫造優恤家事務令得所
宣示中外咸使知聞

錄越王貞子孫勅

越王貞實陷非辜載在國史子孫久廢獎錄所宜宜付宗
正寺尋勘譜牒如是後嗣具狀聞奏

專責令史簡點選人文案勅

應選人及冬集人文案門下省簡勘畢後比來更差南曹令史收領卻納門下甲庫在於公事頗甚煩勞自今已後謹勅吏部過選院本令史便自分付甲庫以備他年簡勘仍請門下省勒甲庫令史每過選時常加檢點收拾明立文案據官吏等遞相分付不得妄有破除南曹申請之時如有稱失落欠少本令史及專知官準檢報措改違條例處分

令李踐方充西川宣撫使勅

蓋天人之際相應如響祥祲之來各惟厥事乃者兵革始
罷黎庶甫寧而蜀土載罹震驚方務綏輯今又水潦爲沴
沉溺實多載省奏章益深軫慮諒以朕澤不逮下誠無感
通五事致咎此方何罪夙夜兢愧憫歎良深宜令戶部郎
中李踐方充西川宣撫使應遭水人戶委與本道觀察使
計會各量稅額所入漂損多少等第分數蠲放今年夏秋
稅錢及租子等如上常平義倉有斛斗處亦委德裕遵古
開倉賑卹更量加優賞使得生聚禁察苛暴存安老疾以
副優屬稱朕意焉

釋鄧晟等禁繫勅

如聞鹽鐵度支兩使此類至多其鄧琬四人資產全以賣
納繫禁動經三載死於獄中實傷和氣其鄧晟等四人勒
責保放出仍委兩使都勘天下州府監院更有此類但禁
經三年已上一切與疏理各具事由聞奏

雨雪賑濟百姓勅

勅朕聞天聽自我人聽天視自我人視朕之菲德涉道未
明不能調序四時導迎和氣乃自去冬以來踰月雨雪寒
氣尤甚頗傷天和念茲庶艱或罹凍餒無所假貸莫能自

存宵寢載懷肝食興嘆怵惕若厲在余之辜思宏惠澤以順時令其天下犯死罪已下除官吏犯賊及故殺人者餘並特降從流流罪已下遞降一等應京兆府諸縣宜令以常平義倉斛斗量事賑卹仍先從貧下戶起給其京城內鰥寡孤獨不能自濟瘠聾跛躄窮無告者亦委京兆尹兩縣令量加賑卹訖具數聞奏躬自省閱務令均贍其諸道雨雪過多處亦委所在長吏量事優卹於戲天生蒸人君以牧之朕憂勤政經思致於理言念赤子視之如傷天或做予示此陰沴撫躬夕惕余甚悼焉布告遐邇明悉朕意

賑卹蘇湖兩州勅

浙西諸州皆有水災蘇湖兩州漂泊尤甚須有賑卹以救
疲人兩州共賜米二十萬石先從貧下戶給並以本州常
平義倉斛斗充

賜李德裕立德政碑勅

勅德裕卿文彰翰苑行振儒風廉察金陵六郡歌惠慈之
化統安白馬三州懷思愛之心凡所踐經理行第一昨者
段凝以轅門將校闔境士農懇請立碑以銘德政朕以舉
善爲教所以勸不能褒賢示後所以報成績國之彝訓莫

金史卷之五
善於斯所令禮部侍郎賈鍊撰文事實頗周詞藻甚麗故
令寫錄專遣賜卿亦別賜段嶷碑本庶慰羣情想當知悉
冬寒卿比平安好遣書指不多及

賜段嶷勅

卿鎮理方隅輯寧封略師戎知訓黎庶保安言念事功良
深倚重德裕頃臨東郡實著政績所諭碑文撰錄已畢故
令送往宜便刊立想當知悉冬寒卿比平安好遣書指不
多及

又賜段嶷勅

卿統鎮滑臺肅寧封部永言休績毗倚良深先奏請歸融
書德裕德政碑文今書畢專令宣賜想當知悉夏熟卿比
平安好遣書指不多及

賑卹諸道旱災勅

朕承上天之眷祐荷累聖之丕圖宵旰兢勞不敢暇逸思
致康乂八年於今而水旱流行疾疢屢作兆庶艱食札瘥
相仍蓋德未動天誠非感物一類失所有過在予載懷罪
己之心深軫納隍之歎宜敷惠澤式表憂勤如聞自去年
以來河東關輔亢旱爲患秋稼不收百姓之中頗甚困窮

今方春之時須務農事若無賑救恐至流亡其京兆河南河東河中等九州府宜賜粟五十六萬石京兆府賜粟十萬石河南府河中府絳州各賜粟七萬石同華陝虢晉等州各賜粟五萬石並以常平義倉及折糴斛斗充如無本色即與運米折給仍委本州府官長明作等第差清強官吏對面宣賜先從貧下戶起給其京兆府太和六年青苗權酒錢在百姓腹內者並宜放免京兆河中河南同華陝虢晉絳等九州府自太和六年秋稅以前諸色逋懸除所由車戶已徵得外在百姓腹內者一切放免議獄卹刑前

王所重苟有冤滯即傷陽和應在城諸司諸軍諸使應有
囚徒速宜䟽理限七日處分訖奏聞河南府等八州府勅
到後亦宜準此處分諸色工役非灼然急切者並勒停省
應久旱處管內名山大川能致風雨者亦委長吏精誠禱
請水旱之數雖云常理導化失節亦致咎災顧惟寡昧敢
忘克責常參官及外府州長吏如有規諫者各上封事極
言得失俟有匡正期於阜安咸啟乃誠用致於理無或有
隱以忝在公内外官有貪暴殘虐蠹政害人者憲司宜糾
察聞奏朕爲人父母虔奉丕業夕惕若厲夙夜匪寧減膳

徹樂庶答天誠咨爾長吏實分予憂勉加撫綏用副惻隱
庶切救災之義爰申爲上之懷中外臣僚宜體朕意

停忌日舉奏刑獄勅

準令國忌日惟禁飲酒舉樂至於科罰人吏部無明文但
緣其日不合釐務官曹即不得決斷刑獄大小咎責在禮
律固無所妨起今後縱有此類臺府更不要舉奏

禁私請賞設錢物勅

諸道如有兵革水旱州府殘破及不存濟爲遠近所知者
除朝廷特有借賜外輒不得自請賞設錢物又諸道戎帥

除替後倉庫便屬後人賞設三軍須待新使近日皆有留別賞給自行私惠頗紊朝章向後諸道節度觀察使除替後並須待新使賞設不得更有留別

追收江淮諸色人經紀本錢勅

中書門下省所將本錢與諸色人給驅使官文牒於江淮諸道經紀每年納利並無元額許置如聞皆是江淮富家大戶納利殊少影庇至多私販茶鹽頗撓文法州縣之弊莫甚於斯宜並勒停兩省先給文牒仍盡追收其去年所減人數雖無挾名尚執兩省文牒亦宜收訖聞奏以後不

承正勅不在更置之限

暫停吏禮兵三部選舉勅

吏部禮部兵部今年選舉並緣秋末蟲旱相因恐致災荒
權令停罷及斂藏之後物力且任念彼求名之人必懷觖
望之念寧違我令以慰其心宜依常例卻置應緣所納文
狀及銓試等期限仍準今年格文遞延一月

聽諸司營造曲江亭館勅

都城勝賞之地惟有曲江承平已前亭館接連近年廢毀
思俾葺修已令所司芟除栽植其諸司如有力及要創制

亭館者給予閒地任其營造

誅王涯等勅

王涯等身爲宰相委任至重與其徒恣行凶惡潛搆姦謀
鄭注草萊卑末寵遇殊常而乃竊發殿庭同爲扶豎險邪
之狀古今未聞賴宗社降靈重臣協力斯須消滅京師晏
寧天下之人所同懽快謀惡之罪國有常刑其王涯賈餗
舒元興王璠郭行餘李孝本羅立言等宜令左右神策差
兵馬防援準舊例領赴郊廟及兩市令衆訖於獨柳樹下
並仰準法處分

以旱停南郊勅

今年郊畿亢旱自夏訖冬以陰陽之久有錯違懼災盛之
未能豐潔祖宗上帝鑒臨左右德馨未達惕焉在懷改龜
薦誠以俟祥歲酌諸典禮亦謂合宜其來年南郊宜停

條流僧尼勅

朕齋居法宮詳念致理思欲建皇極端化源大蘇生靈漸
復古道矧伊耗蠹必在澄清而釋氏宗來自西國殷周已
前何嘗有此唐虞之際寧匪盛時逮至漢明因夢以言徵
傳毅粹詞而臆對遠承象教從此流行蕩然相傳垂七百

祀黎庶信苦空之說衣冠敬方便之門異同之論雖多俗尚之訛未革遂使風驅成俗雲構滿途丁壯苟避於征徭孤窮實困於誘奪永言斯弊宜峻科條自今已後京兆府委功德使外州府委所在長吏嚴加捉搦不得度人爲僧尼累有明勅切在提舉爲我元元務在長育擅有髡削亦宜禁斷比來京城及諸州府三長齋月置講集衆兼戒懺及七月十五日解夏後巡門家提剝割生人妄稱度脫者並宜禁斷且僧尼本律科戒甚嚴苟有違犯便勒還俗若有自願還俗者官司不須立制如聞兩街功德使近有條

約不許僧尼午後行遊雖曰緇徒無非赤子有妨自遂亦軫予懷從今已後午後任行其僧尼在城委功德使其諸州府委本任長吏試經僧尼並須讀得五百紙文字通流免有舛誤兼數內念得三百紙則爲及格京城勅下後諸州府勅到後許三箇月溫習然後試練如不及格便勒還俗其有年過五十以上筋力旣衰及年齒未至夙嬰痼疾并瘡聾跛躄不能自存者並不在試經限若有戒律清高修持堅苦風塵不雜徒衆共知者亦不在試經限天下更不得創造寺院普通蘭若等如因破壞即任修葺於戲理

國之本在正風俗故王化首婚姻之道所以序人倫霸圖著胎養之令所以務生聚況一夫不耕人受其饑一女不織人受其寒安有廢中夏之人習外夷無生之法略期䟽滌用潔源流俾爾齊眊去末歸本庶富之漸其在斯乎凡厥司存勉率吾教各勤檢馭稱朕意焉

罰鄜坊節度使蕭洪俸料勅

方鎮班行散官大夫已上者自於有司陳狀請妻封邑本司磨勘然後上陳如妻已亡又無此例蕭洪贖於常典輒自奏章宜罰一月俸

選皇太子妃勅

冢嗣元良家國之慶人倫之始在娶元妃雖吉事尚更於待年而嘉偶宜深於善教志於先定冀選義方屬在德門遂成好合在東京委裴度西京委宰臣各申旨諭令本宗家長舉言十歲已來嫡女及妹姪孫女兩月內送中書門下務令宜稱無有不盡

賜尚書省本錢勅

尚書省自長慶三年賜本錢後歲月滋久散失頗多或息利數重經恩放免或人戶逋欠無處徵收如聞尚書丞郎

官入省日每事闕供須議添助除舊賜本錢徵利收及吏部告身錢外宜每月共賜一百貫文委戶部逐月支付其本錢任準前收利添充給用仍委都省納勒舊本及新添錢量多少均配逐行分析聞奏須令占額用度不得妄有破除每至季終委都省磨勘申中書門下

重錄已駁選人栗錯等勅

去冬栗錯及長名駁放選人等如聞經冬在京窮悴頗甚街衢接訴有可哀矜宜委吏部簡勘條流鈐轄如非踰濫正身不到欠考欠選大段瑕病之外即與重收以比遠殘

闕注擬不得用平留闕如員闕不相當一唱不伏官者便任冬集不在更論訴限如未經中書門下陳狀勅下後不得續收今年已後不得以爲例

準臺奏國忌日依前例勅

設齋行香近已釐革過密停務自有典常臺司舉奏意在詳密宜依

賜裴度御札

朕詩集中欲得見卿唱和詩故令示此卿疾恙未痊固無心力但異日進來春時俗說難於將攝勉加調護速就和

平千百胃懷不具一二藥物所須無憚奏請之煩也

答裴度辭官表批

省表具知夫爵位崇高以酬勲德君臣協契諒在始終斯乃前王之令圖有國之彝典也況卿輔相憲祖逮於朕躬履歷四朝夷險一致服事君之大節推濟物之深誠道光朝倫行滿天下倚注之意豈同他人屬朕纂歷御乾興師伐叛騷動累歲端憂靡遑及河朔載寧郊丘畢事方欲咨詢元老康靖生靈不虞寒暑所侵勤勞遇疾雖國醫診視中使省臨憂屬之誠頃刻在念忽覽章奏退讓官榮雖知

止之心則思避寵而謀猷之體斯乃爲時寢食之間勉加
頤養其所陳乞非朕意焉

答裴度辭官第二表批

省表具知卿勲績崇高誠節忠蓋秉心一德宣力四朝訐
謨緝熙弼予於理勤勞事國啟沃匪躬功格道光常所嘉
尚所疾未瘳勉於善養勿藥之喜佇即痊平台袞之司倚
卿爲重乃屢陳退讓殊謂不然宜體朕懷即斷來表

答裴度辭官第三表批

省表具悉謝病之制雖起於昔賢盡瘁之詞亦標於古典

況卿有功於國作相累朝自匡輔眇躬又勤勞數載豈可
以微疾去位以重望辭榮章䟽徒來延遲彌切至太宗朝
許李靖致政高宗遂仁軌乞骸朕非不知事則有異何者
時當明聖在上理道已成宰臣優游固得自便今則生物
尚困庶工未修言念勲賢方深倚注惟此故事恐難遽行
卿宜體是誠懷力更頤養必有多福以扶大忠無至確然
復陳表章

答劉禹錫同州刺史謝表批

省表具知卿任居三輔職奉六條累聞問俗之勞載覽勤

人之志言惟顧行深慰朕懷勉宏政經以副優寄所謝知

莊陵禮成優勞德音

禮重飾終義崇敦孝克勤奉卹之志用申罔極之感斯固
寅亮輔臣奔走多士效其忠力濟是儀章俾宏加勞之澤
庶表必誠之報應緣莊陵營奉其山陵使與一子七品正
員官仍特加一階山陵副使按行山陵地使並賜爵一級
各與一子出身橋道置頓使賜爵一級仍特加一階內山
陵兼監修橋道使賜絹一百五十匹銀器二事特加一階
內按行山陵副使賜絹五十匹特加一階山陵修築副使

賜三十匹加一階鹵簿儀仗使並宜賜爵一級各與一子
出身橋道置頓副使加兩階昇梓官官三品已上賜爵二
級四品賜一級陵所造作押當官及中使等三品四品各
加兩階吉凶儀仗諸色行從官等各加一階太極宮宿衛
官及中使大內皇城留守并押當官等五品已上各加一
階撰哀冊謚議冊官各賜爵一級書冊及讀哀冊書寶
讀寶官等五品已上賜爵一級六品已下各加一階鑄造
寶冊裝寶冊及檢校官五品已上各賜勲兩轉中書門下
儀制官題主官昇寶冊官五品已上各加二階六品已下

各加一階山陵使禮儀使判官各特加一階五品已上仍賜爵一級其專知橋道官考滿日放選其知東渭橋官非時放選仍優與處分知道路官各減兩選知頓官各減三選按行山陵使儀仗鹵簿使判官并諸司諸使監當雜職掌官吏等各加二階挽郎放出身後七選許集南郊及太極殿攝太尉侍中告謚冊寶及靈座前進謚寶奏外辦奠玉幣酌獻等官賜勲兩轉其山陵禮儀鹵簿儀仗等使并諸使諸司軍將官吏如執當務重功效尤異制勅中不該者委本軍本使本司具名聞奏中書門下奏聽進止其三

原縣百姓今年秋青苗錢並放免其高陵縣量放一半

平李同捷德音

王者誅暴亂弔傷殘明賞報功拯弊綏衆蓋爲邦之大紀也李同捷頃自先朝擅謀專土輒抗成命私行墨縻暨朕臨御實思含垢授之以充海諭之以詔書使臣相望凶妄自若而更挺妖結黨劫衆阻兵毒流無辜害被闔境由是藩臣瀝懇卿士獻規至於興戈諒非得已自元戎環壤王旅進攻卵窺危巢颺振槁葉動必乘彼機會退皆扼其咽喉故戴義啟入郢之殊庸李祐展下城之勝略累稔逋寇

一朝削平此誠天人合符中外叶力永言勲效無忘寤思
其戴義及李祐應加爵命并幽州及齊德兩道行營將士
各有賞賜並已從別勅處分其賜物仍委度支逐便速與
支送仍命使臣分往宣慰各於當處厚加宴勞其立功軍
將未經寵授者委戴義李祐即差次等第速具聞奏即有
甄獎用答勲勤李同捷力屈計窮方圖轉禍朕好生存性
初議貸刑而面縛在途陰懷狡計夜縱火號潛誘家童更
謀網漏自速梟獻憫彼凶魁坐沈家族顧茲貽戚載軫予
懷其母孫氏妻崔氏并男及家口等並宜特從寬宥令於

湖南管内諸州有空閒處安置其歸降將卒不涉翻覆者
委戴義李祐審加勘實各與衣糧分配驅使其滄景等州
將士有謀執凶黨竟遭誅夷或雖被劫致能全名節者並
委李祐按實條奏量加贈錄其滄景德棣等四州百姓有
是近日被賊點召團結者並放歸營農除非同惡相濟以
死拒命者餘一切不問四州百姓久陷汚俗每罹威虐莫
非吾人今旣脫難當施德令並宜給復一年不能自存者
量給種食其刺史縣令仍令中書門下慎擇循良俾加存
撫應諸將校自經戰伐或致死亡載念捐軀每深憫歎並

委戴義李祐審加勘定具名銜事跡申奏即與褒贈其長
行官健陣亡者並令所在長吏量與收葬同爲祭酹其家
口在者各委本軍優卹仍三年勿絕糧賜其有因中矢石
遂至殘廢者各委本軍厚加存養仍給衣糧終身勿絕勅
旨有未該者委戴義李祐比類更作條件奏聞其昭義義
武等軍行營在賊境者比相犄角皆有功勤各別有處分
於戲整師除害義切於安人撫俗策勲道存於布澤爰申
彝典且乂新邦咨爾多士宜悉朕意

賑卹諸道水災德音

朕以寡德臨御萬邦宵旰憂勤匪敢自暇然仁未及物誠不動天陰陽失和水潦爲敗致茲災沴害及生靈江淮之間滁和尤甚當宁軫惕永言疚懷其淮南道滁和兩州應水損縣據所申奏漂溺人戶處宜委本道觀察使與本州刺史子細檢勘全放今年秋稅錢米仍以義倉斛斗逐便據戶賑接其浙西浙東宣歙鄂岳江西鄜坊山南東道並委觀察使與所在長吏據淹損田苗漂壞廬舍及蟲螟所損節級矜減指實奏聞如沒溺甚處亦以義倉量事賑救其京兆府河南府所損縣即據頃畝依常例檢覆分數蠲

減州縣牧宰各務撫安必令均濟稱朕意焉

冊立皇太子德音

門下帝者承天地貞邦國法明離之象固鴻業之本必命
元子以備儲闡斯皇王之令謨古今之丕典朕祗受眷祐
虔恭寶圖欽若彝章光修前緒皇太子永幼稟仁智生知
孝愛體溫文以立德資敏哲以保躬寬裕有常貞慎無怠
爰膺盛禮俾奉青宮嚴宗廟主鬯之儀遵朝夕視膳之節
冊命云畢感悅良深問安旣慶於寢門布澤宜覃於天下
自太和七年八月七日昧爽已前天下應犯死罪降從流

流以下罪遞減一等惟官典犯賊及故殺人劫獄奪囚持
仗強盜者不在此限左降官流人並與量移如應流貶及
諸色得罪人所在亡沒並任歸葬宗周之盛實在於維城
二漢之隆亦由於磐石自開元以後累聖子孫皆長於深
宮罔知稼穡並不得習詩書以修禮樂交氣類以敘人倫
雖有閒平之才莫施魯衛之政永言淪廢深疚朕懷諸王
等宜以今年以後相次出閣且授緊望已上州刺史上佐
觀其才能續有序用人倫所先婚禮爲重笄年許嫁別有
明文其十六宅諸縣主亦宜選擇良偶以時出適仍委吏

部於諸色選人中取情願者揀擇具名聞奏亦當別加優獎令其就禮漢代用人皆由儒術故能風俗深厚教化興行近日苟尚浮華莫修經藝先聖之道湮鬱不傳況進士之科尤要釐革雖鄉舉里選不可復行然務實抑華必有良術既當甚弊思有改張今寰宇乂寧干戈已戢皇太子方從師傅授傳六經一二年之後當令齒胄國庠以興墜典宜令國子監於諸道搜訪名儒置五經博士各一人其公卿士族子弟明年已後不先入國學習業不在應明經進士之限其進士學宜先試帖經并略問大義取經義精

通者次試議論各一首文理高者便與及第其所試詩賦
並停其試帖經官便以國子監學官充禮部不得別更奏
請宏文崇文兩館生齋郎並依令式試經畢仍差都省郎
中二人覆試須責保任不得輒許替代苟涉情故必加罪
責卿大夫者羣下之所視遠方之所倣若非恭儉克己廉
貞化人而望其服從固不可得況朕不寶珠玉不御纖華
逮於六宮皆務儉薄卿大夫得不叶朕此志率先兆人比
年所頒制度皆約國家令式去其甚者稍謂得中而士大
夫苟自便身安於習俗因循未革以至於今百官士族起

今年十月服冬裘已後其衣服輿馬並宜準太和六年六月十七日勅處分如固違制度九品已上量加黜責其布衣五年不得舉選百姓軍人各委州府長吏漸施教化使自遵行不要便爲禁制令其驚擾惠養疲人本於廉吏阜其生殖在絕貪求其諸道方鎮刺史等有聚斂貨財潛行饋遺者委御史臺糾察以聞仍委度支鹽鐵分巡院同爲訪察不得容蔽親人之官切在守長久於其道政乃有成方鎮刺史三考已下不得輒議替換如理有異等委中書門下訪察就加寵獎如灼然可錄者別與甄昇其或政理

有非害及百姓者即不在滿三考限易譏豐蔀傳美卑宮
彫刻磨礱先賢有戒近者官纔昇於郎署位始至於郡符
莫不高其閤闔廣以池榭非惟僭侈踰制實亦耗蠹傷財
其百官第宅已造成者並許仍舊今日已後如更有創立
新宅及屋宇高大者並委御史臺糾彈必嚴加黜責御史
臺所置六察分糾百司比來因循鮮能舉職起今已後諸
司如有身名僞濫盜官錢及違法等事他時發覺者本察
御史各並當貶斥考課之法前王所重蓋以總覈吏理勵
精政途名實苟違將何勸激宜準故事署內外知考使兼

令中書舍人給事中各一人監考百姓困窮弊由奸吏政苟不擾人皆自安其司農寺供宮內及諸司廚冬藏菜並委本寺自供其菜價仍委京兆府約每年時價支付更不得配京兆府和市其諸陵守當夫宜委京兆府以價值送陵司令自雇召並不得差配百姓寒食杏仁鷄子月進土蘇白麥樹栽選場棘穉修橋梁木等便於本戶稅錢內剋折不得更令和市天下諸州縣應納義倉及諸色斛斗除準式每斗二合耗外切加禁斷仍委度支鹽鐵分巡院及出使郎官御史切加訪察如聞今歲所在豐稔其義倉斛

斗先有借用處委戶部勾當並須及時填足文武常參官
諸州府長官子爲父後者賜勲兩轉緣冊太子攝太尉稱
賀攝侍中承旨宣制進中嚴外辦攝中書令讀冊授冊各
賜爵一級其行事職掌官及書寶引冊寶昇舉冊寶禮儀
使禮官等三品已上賜爵一級四品已下加一階撰冊文
官特加一階仍並賜物有差導引官各加一階造冊寶金
字裝寶人賜勲兩轉行事流外及禮生等各賜勲一轉文
武常參官及陪位官并宗子諸親各賜勲一轉魯王府官
未經進改者量與進改其皇太子侍讀宜委中書門下精

金
卷之八
三
擇二人具名聞奏天下孝子順孫先經旌表門閭者及年
高廢疾者委所管州縣各加存卹五嶽四瀆名山大川委
所在長吏等量加祭祀布告遐邇咸使聞知

欽定全唐文卷七十五目錄

文宗七

太和八年疾愈德音

曲赦京畿德音

賑卹諸道百姓德音

討鄭注優賞軍士德音

誅王涯鄭注加恩中外德音

上皇太后冊文

冊魯王永文

欽定全唐文

卷七十五

目錄

冊九姓迴鶻愛登里羅汨沒密施合句祿毗伽彰
信可汗文

冊魯王爲皇太子文

冊裴度司空文

太和改元赦文

南郊赦文

開成改元赦文

華嚴四祖清涼國師像贊

欽定全唐文卷七十五

文宗七

太和八年疾愈德音

門下朕祇若天命纘承睿圖正統紀以清庶方序彝倫以貞百度慄慄寅畏於茲九年雖儉己飭躬推誠育物懼有未至不遑宴寧屬節氣交時疾恙嬰體列聖垂佑涉旬復初旣上慶於兩宮宜覃恩於兆姓庶與寰宇同茲福祥自太和八年二月九日昧爽已前天下應犯死罪降從流流徙等已下罪遞減一等惟官典犯贓及諸色所由破用官

物故殺人十惡等罪不在此限左降官流人緣近有去年八月九日勅宜即與處分爲政之要必在去煩厚下之恩莫先已責應度支戶部鹽鐵積欠錢物或囚繫多年資產已盡或本身淪沒展轉難徵簿書之中虛有名數囹圄之下常積滯冤言念於斯所當矜恤其度支戶部鹽鐵應有懸欠各委本司具其可徵可放數條流聞奏不得容有姦濫在京諸司諸使食利錢其元舉人已納利計數五倍已上者本利並放其有人戶逃死攤徵保人其保人納利計兩倍已上者其本利亦並放免其納利未滿此數者待納

利數足徵本停利其諸色私債止於一倍不得利上生利
仍委本縣各爲詳理處分京邑之中本無權酤屬貞元用
兵已後費用積廣始定店戶等第令其納權況萬方所聚
私釀至多禁令旣不可施權利自無所入徒立課額殊非
惠人其長安萬年兩縣見徵納權錢一萬五千一十貫八
百文若先欠者並宜放免其權酒錢起今日已後亦宜並
停比者滄寇干紀稽誅數年諸道興師屢獻戎捷時方討
叛難議釋縲免死戍邊已爲恩貸今滄州一道久被朝章
念其懷土之心必有向隅之歎俾之遂性用洽優恩其諸

道所送滄州將健配流及邊鎮營田役使者共一千三百五十九人並委諸道節度觀察使據現在人放歸本管如有已效軍職及自有生業不願去者亦任便住董昌齡自至邕州累平溪洞兵威所向首惡皆擒然每念蒼生無非赤子況在荒徼尤當撫循其溪洞如有未歸附者向後非因侵擾更不用進討仍加存撫使各懷安其所獲黃洞百姓並分配側近州縣令自營生不得沒爲奴婢將充賞給如元是奴婢者即任充賞南海蕃舶本以慕化而來固在接以恩仁使其感悅如聞比年長吏多務徵求嗟怨之聲

達於殊俗況朕方寶勤儉豈愛遐琛深慮遠人未安率稅
猶重思有矜恤以示綏懷其嶺南福建及揚州蕃客宜委
節度觀察使常加存問除船腳收市進奉外任其來往通
流自爲交易不得重加率稅天下諸州府如有冤滯未伸
宜委御史臺及出使郎官察訪聞奏於戲朕百靈所祐獲
遂痊和虔奉神休敢忘昭報其五岳四瀆天下名山大川
各委所在長吏致祭仍加豐潔以副精誠朕以寡德上奉
丕構宗社流慶元穹叶靈微恙愆和旋就康復渥澤思及
於人瘼儆戒先自於朕躬俾我華夷共歡富壽中外臣庶

金史卷之二十一
十一
宜體予懷主者施行

曲赦京畿德音

王者愛人如身推己及物恤其寒燠之苦適其舒慘之宜
俾協太和用臻至理朕恭默思道憂勤在懷時屬嚴沴念
深徽纒當霜雪之候滯囹圄之中饋餉爲勞逮捕斯擾沍
寒所迫愁歎必多惻然疚心思有矜降宣布茲寬之令使
無留獄之嗟應京百司及畿內諸縣見禁囚徒應犯死罪
特降從流流已下者遞減一等如欠官錢情非巨蠹責保
填納不要禁繫惟故殺人者及官典犯贓不在此限仍委

京兆府及諸司官長制下日當速䟽決聞奏朕司牧黎元存誠寰宇況封甸殷廣京師浩穰憫觸法以罹辜式加恩而宥罪庶亡無告寧失不經宣示中外令知朕意

賑卹諸道百姓德音

朕以寡德託於兆人之上雖兢兢業業思理不怠而政道多闕和氣用傷仍歲水旱黎人艱食爲之父母斯心鬱陶如聞魏博六州阻饑尤甚野無青草道殣相望及山南東道陳許鄆曹濮淮南浙西等道皆困於饑疫慮乏糧餉其魏博宜賜粟五萬石山南東道陳許鄆曹濮等三道各賜

糴米三萬石充賑給委度支逐便支遣仍各令本道據饑
乏之處賑給淮南浙西兩道委長吏以常平義倉粟賑賜
應諸道有饑疫處除出軍糧積蓄之外其屬度支戶部斛
斗並令減價出糶以濟貧人其有牧宰非才貪殘爲害及
承前積弊須有條流或冤獄留滯速宜疏決者並委觀察
使糾察詳訪具狀聞奏用弭天眚以副朕焦勞之慮焉

討鄭注優賞軍士德音

門下王者之御天下也推至誠以格物委大信以任人故
能邦家用寧上下交感所以詔爵祿而不愆待臣下而無

疑豈謂變起股肱患生毗倚寤寐興歎難弭於懷且負德
背恩干紀悖戾古今未有能濟者蓋人神之所不容逆賊
鄭注氣本兇狂志懷奸逆害時蠹政卜射張皇行詐而徑
術多端黷貨而谿壑難滿情惟黷白口可鑠金罔冒包藏
爲惡滋甚朕九重之內不得備聞擢於妄庸驟列華貫入
司喉舌出總爪牙惟務廢忘不思報國棄生成之恩義亂
君臣之紀綱稔慝興祲前古未有罪同梟獍法在必誅況
詔旨旣追已離城堞險謀且敗中路遽迴又迤邐使人迎
接逆賊李訓稽之國法豈逭常刑其鄭注在身所有官爵

並宜削奪將士如有能奮揚義勇執戮渠魁者先是六品
已下官者便授三品正員官其先是五品已上官者節級
超獎仍賜莊田各一區錢二萬貫如有能率所管兵馬以
州郡來降者超三資與官便正授岳牧仍賜錢帛諸道將
士雖各守疆土非爲進攻如被侵掩因事立效者亦準前
例節級處分賊如能知義悔過束身歸朝並與洗雪仍加
寵獎幽明可鑑朕不食言但有款誠自通即委諸道與奏
若不能悛改自取誅夷罪止一身其餘脅汙一切不問其
有迫於凶威曾著失節顧存家族事出權時待其平寧並

從寬宥將士如有潛謀立功效順被其屠戮並優加追贈并賜錢帛仍與一子官應州縣百姓陷在暴虐莫保性命誠可哀矜諸軍環境不得妄加殺戮并焚毀廬舍掠奪資產及有拘執以爲俘囚如有歸投者委諸道據丁壯老弱量加優卹仍給與空閒田地使就生業事平之後願歸本貫者亦聽鳳翔一軍素著忠義每臨霜雪之際實見松筠之心凜然義風簡在朕志其大將及軍士並宜坦懷自處勿以爲憂兵革旣平寵待如故鄭注初到鎮日聞有優賞軍將常事不足爲疑州縣百姓亦當優給復勉於自效以

保令圖於戲佳兵者聖祖之所戒文德者前哲之所崇肆
予寡昧敢忘丕教然以齊四方者號令立人紀者君臣斯
言苟違大倫安設今則絕其奔軼示以申嚴懷柔誠貴於
止戈執惡何慚於用武布告中外咸知朕意

誅王涯鄭注加恩中外德音

朕以翼翼之心孜孜求理十年之內庶政未凝極其焦勞
志在博採聿觀奇士冀獲長才取其節焉不顧發迹故李
訓鄭注咸得進言望其沃心每許造膝邪人奸色順非而
澤信行聽言深心厚貌包藏不忤僞辨無疑梟獍爲心禍

亂忽作意欲翦除中外悉去大臣志願非常自謀安泰賴
上天垂祐宗社降靈同惡雖多姦謀竟敗忠臣輸力保護
朕躬是日弭寧已嘗布告尚聞閭里未悉予心猶有浮言
謬相誑惑朕君臣之際疑間不行致此妖妄慚非哲惠前
月二十一日王涯賈餗舒元興李訓鄭注李孝本韓約羅
立言王璠郭行餘魏逢等親率金吾兵仗又郭行餘王璠
領所部將健持兵上殿叶謀不軌傾覆社稷謀害中外凡
此凶徒悉已梟戮絕其遺類以謝忠良內外庶臣卿士百
辟體予前志宜即自安無惑浮言尚相恐怖式布維新之

慶宜申在宥之恩京百司見禁囚徒死流罪遞減一等未結正者推問畢日準此處分諸色所繇官吏陷於脅從雖有名籍涉於註誤者一切不用更問仍付左右神策兩金吾京兆府御史臺並準恩赦處分休便追捕其有潛藏迴避限令出三日各歸本司逆人親族已處置外其餘周親已上一切不問所在更不用繫留聞報其先有定名捕捉者所在尋追獲日奏聞不得漏網昨者有擅入逆人之家盜掠財物擁無故之利生怙亂之心尚有縱酒聚徒妖言惑衆志於掠盜恐嚇居人假託軍司輒持兵器及以前月

二十一日事妄相告訐者委御史臺京兆府嚴加伺察擒捉奏聞所在集衆決殺不在恩赦之限於戲齊晉之難桓文是興注訓之妖朕志先定識邪正之路辨消長之端覩衆臣宣力於急難見禁旅摧凶於頃刻當危急之際識臣節之勤藏於予心何日可忘宣示中外宜體朕懷

上皇太后冊文

嗣皇帝臣昂言古先哲王之有天下也必以孝敬奉於上慈惠浹於下極誠意以厚人倫思由近以及遠故自家而刑國以臣奉嚴慈之訓承教撫之仁而長樂尚鬱其鴻名

內朝未崇於正位則率土臣子懃懃懇懇延頸企踵曷以塞其心乎是用特舉彝章式遵舊典稽首再拜謹上穆宗睿聖文惠孝皇帝妃尊號曰皇太后伏惟與天合德義申錫慶允釐陰教祇修內則廣六宮之教參十亂之功頤神保和宏覆萬有

冊魯王永文

維太和四年歲次庚戌二月景午朔十二日丁巳皇帝若曰咨爾元子其敬聽朕命我國家累葉重光詒休昌運奄有區宇垂二百年良以親親無私建立子弟克固磐石作

藩王家洎予踐位敢忘丕訓是用酌於舊典謀及台臣撰
茲吉日錫以青社惟爾道扶正性天假令儀已彰岐嶷之
名載嘉信厚之器持大公之道且不愧於知子舉守藩之
命亦將教於事君爰擇樂郊俾王曲阜環以沂水遂荒海
邦今用命使兵部尚書平章事牛僧孺副使左散騎常侍
吳士矩持節冊命爲魯王於戲爾宜守正閑邪去奢昭儉
害於德者不作逆於耳者必聽無昵宵人無遠端士纂東
平之樂善師河間之好古日慎一日行之爲難敬爾有國
無墜我休命

冊九姓迴鶻愛登里羅汨沒密施合句祿毗伽章

信可汗文

維太和七年歲次癸丑某月日皇帝若曰王者運神功以清九有敷至德以柔四夷雖萬國建邦皆有君長而一時繹禮特厚親隣用昭絕漠之榮式示徽章之貴克膺盛典允屬雄材咨爾九姓迴鶻愛登里羅汨沒密施合句祿毗伽彰信可汗代濟公忠時推英毅剛明有守信實不渝總北方勁悍之師慕中華清淨之化克昭前訓實懷遠圖慶叶承家願申永好彼無侵軼此務綏安兩國咸歡六姻彌

重事大之義而合志春秋相嚮之誠而皎如日月使臣旁
午贊幣交馳詞意綢繆禮貌恭恪是嘉誠款宜錫寵光必
能虔受新恩纂乃舊服今遣使寧遠將軍右金吾衛將軍
兼御史大夫上柱國賜紫金魚袋唐宏實副使中大夫將
作少監兼御史中丞賜紫金魚袋嗣澤王容等持節備禮
冊爲九姓迴鶻愛登里羅汨沒密施合句祿毗伽彰信可
汗於戲海內四極惟唐舊封天下一家與我同軌舉茲典
冊布於神明爾其慎固封疆祇守名器罔墜先烈載揚令
猷欽承禮文以作來範

冊魯王爲皇太子文

維太和七年歲次癸丑八月甲申朔七日庚寅皇帝若曰
王者欽若天道君臨萬方必崇上嗣以固邦本所以尊守
器而重承祧也我祖宗受天明命光宅區夏元光被於生
靈利澤霈於遐荒逮予寡昧繼續鴻緒虔畏寅懼不克負
荷思崇大典用建元良俾膺主鬯之重式叶奉先之慶咨
爾元子魯王永惟哲淑聰明溫文粹和夙表岐嶷生知孝
敬洎苴茅分社磐石啟藩蘊東平樂善之心慕河間大雅
之操天縱宏量日新令猷人神協志著龜獻兆是用命爾

爲皇太子往惟欽哉修己有度敬事無違居必思義動必率禮講道勵學親師尚賢則可以正曜於前星配德於重海以承列祖以奉棗盛恢宏懿圖無忝丕命可不慎歟

冊裴度司空文

維年月日甲子皇帝若曰三台羅列以承斗極皇王取象以建三公將以調陰陽又萬國論道興化與天地參故職官物采不足以昭彰物數於是有明庭冊拜清廟謁見之禮以尊異之咨爾金紫光祿大夫守中書侍郎同中書門下平章事兼淮南節度副大使知節度事晉國公裴度有

文理有武功有直聲有忠節宏深如大浸峭拔如喬岳愛
人如慈母宰物如權衡師儒術於素王授兵符於黃石百
行九德疊於其躬先王以上聖之資啟中興之運咸有一
德時惟汝諧召雲命呂翕受交感翌助神算底綏四方大
旆東搖淮夷蕩定長策獨運全齊以平解紛消慝無小無
大去權樹善或顯或晦非可以造次詳非可以一二計肆
予小子昔當守器休功令問充溢聽聞逮此纘承委重藩
鎮達經國之大體有事君之小心知無不爲功多不伐可
謂社稷之元老經濟之宏材者也予嘉乃勲懿乃德庸建

爾于上公爾惟省厥初念厥終任天下之安危爲夷夏之表式俾先帝之鴻業休德不墜於地俾予一人實受其福於戲敬哉

太和改元赦文

朕聞古先哲王之爲理也修己以安百姓恤刑而矜庶獄端立政以謹始宏厚澤以體仁推其心以及於物誠其中而化於外和氣斯洽休徵以臻故兵革不試而四海寧疵癘不作而三靈泰我有唐祖武宗文光宅天下列聖承統遂康區中漸濡丕冒掩軼前載宏茲道以騰英聲煥其文

以耀終古惟此鴻業屬予沖人荷無疆之不構託於兆人之上晝惕宵儆怒焉如疚仰惟宗社儲休神祇協力克靖內難恢復王綱思布和以立極爰正風於更始因體元紀號之典舉肆眚覃恩之命昭我恤隱與人維新可大赦天下改寶曆三年爲太和元年正月十三日昧爽已前大辟罪已下罪無輕重已發覺未發覺已結正未結正見繫囚徒常赦所不免者咸赦除之惟十惡五逆及故殺人官典犯入已贓不在於免限左降官量移近處已經量移者更與量移其合復資者五品已上中書門下速與處分六品

已下任從常例選丁憂去任在憂未赴貶所者服闋日亦與量移如有親故在上都任經本司陳狀不必更待州府申請流貶之中縱勅不許量移者及言終身勿齒者亦與依例處分亡官失爵各與收敘痕累禁錮並從洗滌其緣去年十二月八日坐累流隸者不在此限應緣山陵制度及喪儀禮物宜委中書門下及諸司長官博詢故實務遵禮度必誠必信副朕哀懷所緣山陵造作及橋道置頓所資並以內庫錢物充用如不足以度支戶部錢充京兆府今年夏稅青苗量放一半太皇太后第二等已上親大行

皇帝皇太后第一等親委中書門下量才敘用九廟子孫
陪位者各加兩階仍據始封每王後與一人出身委宗正
卿檢尋圖譜取一房最沈翳者充數具名聞奏内外文武
官及諸色人任上封事極言得失無有隱諱天下諸色人
中有賢良方正能直言極諫者及經學優深可爲師法詳
閑吏理達於教化軍謀宏遠堪任將帥者常參官及方牧
郡守各舉所知無人舉者亦聽自舉并限來年正月到上
都今年正月十四日上皇太后尊號及朕受冊進寶撰即
位冊文承旨宣制等官各與一子正員七品官江王府官

去年十二月已前在任者並與改進其去年十二月九日立功將士普恩之外三品已上更賜爵一級四品已下更加一階其赴難軍使兵馬使都虞候將士等仍各與改轉名銜聞奏

南郊赦文

門下王者祇見宗廟情極於孝思肅事郊丘義崇於嚴配諸侯駿奔以助祭百靈矜饗而降祥感達神明斯爲茂範朕以冲昧獲嗣丕圖奉累聖之耿光承上天之眷命以簡易宏宣政本以勤儉調順化源宵旰勵心思臻至道兢業

寅畏於今四年屬興伐叛之師未暇燔柴之禮賴祖宗保佑上帝監臨氛慝澄清弓戈橐戢今因南至有事圓丘薦誠敬於二儀申感慕於九廟羣祀來享至誠必通旣陳信以告虔宜覃恩而廣澤可大赦天下自太和三年十一月十八日昧爽已前大辟罪已下罪無輕重已發覺未發覺已結正未結正見繫囚徒常赦所不原者咸赦除之惟犯惡逆已上及故殺人官典犯正入已贓不在免限左降官量移近處已經量移者更與量移如復資者五品已上中書門下速與處分六品已下即任依常調選丁憂去任服

闕日亦與量移如有親故在上都任於所司陳狀便與處分不必更待本州府申請別勅因責授降資正員官未經改轉者量與進改亡官失爵放歸不齒者量加收敘縱元勅云終身不齒者亦量與收敘流人未到所在及已到者並放還惟降死從流者並與移近地如已收敘者量才錄用并僧尼道士移隸者亦與改還得罪人已亡歿家口未許歸者一切放歸如有情願留者亦任諸色得罪人中如先勅云縱逢恩赦不在免限者并別勅安置者亦並委中書門下量事狀輕重節級處分左降官及流人先有官者

如已亡歿各還本官流貶人及諸色得罪人所在身亡任其親故收以歸葬仍仰州縣量給棺槨優當發遣諸色人中有痕累禁錮及逃匿者一切並與洗滌常參官及諸州刺史有先因停替及以病解免并終制未授官者委中書門下量才進擬勿令稽遲選才命士所貴任賢黜貨鬻官深爲貶法縱思寬宥亦慮惠姦其有僞官出身人近已從流者與移近處未處分者減等處分未發覺者賣官買官人並仰赦書到後一月內於所在納官告陳首得免其罪如不陳首者已後事覺不在免罪限封畿之內供億常殷

旣渥恩施宜加霑給其京兆府明年夏青苗錢宜放一半
財貨之司姦屈皆有切資政理以遏倖門應度支鹽鐵戶
部三司所管諸色官吏所由人戶等欠負太和元年已前
諸色錢物斛斗等各委本州盡理勘實如是貿易招狀入
已隱欺即準條處分如緣收貯年深盤覆欠折水火漂蕪
事實有憑如此之類除檢責家產及攤徵元保外如實無
可納空挂簿書連年囚禁者宜各具色目聞奏河南諸鎮
仍歲兵荒百姓困窮宜有蠲免其鄆曹濮淄青兗海及滄
德管內齊州明年夏稅錢每貫放二百文其稅子每畝十

分放二分諸道方鎮自兵興以來或緣進奉助軍或緣本道徵發務求濟辦多是權宜今寇賊旣平中外無事宜申典法以救傷殘天下除二稅外不得輒有科配其擅加雜權率一切宜停仍令御史臺及出使郎官御史并所在巡院嚴加訪察自滄景用兵所在逐急須借諸州常平義倉斛斗權充軍糧宜令度支勘計速遣收糴填數聞奏邊防至重悉宜有素器械倉廩尤須精實比歲有司屢以營屯奏報約計諸鎮儲蓄合支數年尚恐主吏欺罔未加約束宜委度支與本道節度及營田使子細勘會自營田已來

所貯糧見在倉者多少支得幾年軍糧具實聞奏又緣邊
諸鎮兵額虛實器械色目亦仰聞奏如涉虛謬本判官必
加懲責有欠闕當議添置務令撫實無挂空文纂組文采
貴貨勞人奇技淫巧蕩心喪志將欲導其儉樸必在抑其
華飾率化天下先自朕躬應緣乘輿服御宮禁供須一事
已上當從儉約自今已後四方並不得輒以新樣難得非
常之物爲獻其機杼織作有纖麗尤甚若花絲布繚綾之
類及幅尺廣狹不中常度者並宜禁斷仍仰天下州府勅
到後一月日內所有此色機杼一切焚棄訖聞奏并委觀

察判官嚴加檢察犯者以故違勅論縣令政切親人糾曹
職當舉轄命於選部非不擇才比者令常參官得各舉縣
令所舉不當雖有明文法旣因循遂開僥濫自今後宜令
諸州刺史及本道觀察使各舉管內堪任縣令錄事參軍
者仍須資考相近并據闕申奏所舉官如才職不稱刺史
書下考如至贓犯闕刺史停見任觀察使據事輕重臨時
處分如政事修舉課第殊尤亦當明賞以勸能者立法之
意使人不移苟私用之有名在公費而何害天下州府兩
稅占留錢每年支用各有定額其迴殘羨餘準前後赦文

許充諸色公用長慶四年二月三日制亦具言緣無分明條件可使執守刺史每被舉按即以坐贓論須爲立程俾無甚弊其州府應合公用羨餘物并因循舊例與格令不同者並令尚書省御史臺明立條件散下州府使知所守永可遵行緇黃之衆蠶食生人規避王徭凋耗物力應諸州府度僧尼道士及創造寺觀累有禁令尚或因循自今已後非別勅處分妄有奏請者委憲司彈奏量加罰責其百姓中有苟避徭役冒爲僧道所在長吏量爲科禁古者理戎皆舉成法將卒有制簡閱有時所以籍無虛名軍無

食
二
三
冗食至於符守各奉詔條諸道先發轄屬支郡將士如聞
衣糧解補猶繫使司詳其事理頗非簡便宜委本使差官
檢元轄名額及賜糧等第文案與刺史勘會除續準詔勅
抽停外據所合給錢米並以當州合送使錢米依虛實糙
熟分數折計劃入留州錢米數勘會訖州使各具分數聞
奏應緣解補支給并委本州其使司更不緣得收管諸道
諸州所置將吏如非原額周事之外更隨閒劇務從簡省
方鎮刺史在京除官所須收補隨從人數有司即爲節限
他時替罷仍令隨使停解其方鎮交代之時及知留後官

不得輒有補置如違委巡院官具事目申臺司錄奏其違犯官重加科貶所補人并本職停解刺史職在分憂得以專達事有違法觀察使寧不糾繩如聞遠地多未遵守州司常務巨細取裁至使官吏移攝將士解補占留支用刑獄斷結動須稟奉不得自專雖有政能無所施設選置長吏將何責成宜委御史臺及出使郎官御史嚴加察訪觀察奏聽進止本判官不能匡正及刺史不守朝章並量加貶降若所管州郡控接蕃夷軍戎之間事資節制須得使司共爲條理即不在此限邦畿之內物役殷繁事苟不均

人何以濟如聞近年以來京城坊市及畿甸百姓等多屬
諸軍諸使諸司占補之時都無旨勅差科之際頓異編氓
或一丁有名則一戶合免往年制勅無復遵行宜委本軍
本使及京兆府切加提舉準元和二年八月京兆府所奏
勅及長慶元年制度節文處分自先朝以來累有赦令防
姦除弊條目甚詳至如閉糴禁錢橫徵暴賦兩稅物估之
虛實四方進獻之豐省再三處分非不丁寧出令不行名
實自爽從元和二年已後所有勅令宜委中書門下及內
外百司按事施行勿踵前弊仍令御史臺嚴加糾察諸色

出身三衛最濫假冒官蔭妄用優勞補旣過多簡亦失實
旣參選敘命此理人積歲倖門誠宜杜塞其三衛三二年
且不得補待簡先補人數盡無如更要補委有司條疏嚴
爲限制每所補注挾名替闕如便可停廢亦詣實奏聞禮
著從人詩稱下嫁義當選尚俾各有行其六宅十宅諸王
女縣主宜令每年於選人中擇其情願者配尚授官之日
量加優賞罷秩之後仍減兩選其初婚者更有賜與使備
行禮如非士類不在選限其該載未盡處委中書門下別
條疏聞奏量能授用允屬於羣材舉善推賢是先乎公族

經學可以宏教本高尚可以觀時風宗子中有才行著明文學優異者委宗正寺具名聞薦比類加獎諸色人中有精究經術洞該今古求志不期間達委所在長吏具以名聞國家與吐蕃甥舅之好彼此無虞自今已後邊上不得受納投降人并擒獲生口締構興運翼贊昌期勲鏤鼎彝名光簡冊載懷夙烈何日忘之武德已來配享功臣及將相名跡尤著節義顯聞而子孫陵替官闕廢墜未經甄錄者委中書門下搜訪允嗣特加優異故尚父汾陽王贈太師晟贈太尉秀實子孫中未經甄獎者每家與一人正員

官磐石之親義資敦敘穠華之慶道備肅雍文武庶僚中外執事或敬恭厥位或祇奉嚴禋爰考舊章用申慶澤亞獻循王通終獻恭王通等各賜物一百匹夾侍正衣進珪捧珪各賜物五十匹亞獻終獻正衣各賜物四十匹大長公主長公主嗣王郡主縣主各賜物有差内外文武見任及致仕官三品已上賜爵一級四品已下加一階合入三品五品次考未合敘者待考足日聽敘素王設教崇儒配於斯文虞賓在庭想遺風於先烈微言不墜令德攸彰文宣王之後及二王三恪各與一子官其祠廟委所在量加

修飾禮重睦親化先合族慈訓克承於椒掖寵光宜首於
觀津太皇太后皇太后二等已上親皇后三等已上親委
中書門下各擇有才行者量與改官無官者各與出身皇
五等已上親三品已上賜爵一級五品已上加一階六品
已下及前資常選散官簡選日優與處分未有出身陪位
者每家放一人出身應陪位皇五等已上親及太皇太后
皇太后三等已上親三品已上賜爵一級四品已上加一
階諸親四等五等并諸色陪位官五品已上加一階六品
已下及白身人並賜勲兩轉其前資及有出身者各減一

選推恩之令所以申孝愛褒贈之典所以極哀華爰加寵
章用舉徽數常參官及諸道州府長官父母見存有官封
者並量與五品致仕官及階并邑號如已有者量與進改
如官已至五品已上者即與五品階父母亡歿未經追贈
者量與贈官及邑號輔弼之臣鈞衡是屬旣當大慶爰錫
殊恩中書門下及節度使帶平章事者宜特加一階如本
階已至正三品已上者與一子正員八品官祖父母先亡
歿各與追贈已追贈者更與改贈節度使與一子正員九
品官東都留守度支鹽鐵使觀察處置都團練都防禦經

略招討使及神策金吾六軍將軍上軍統軍威遠鎮國軍等使皇城留守各與一子出身父母先亡歿未經追贈者各與追贈禮儀使大禮使京兆尹各與一子正員九品官大祀有嚴殷薦尤重凡在厥職宜特加恩應郊廟升殿行事官普恩之外宜更加一階如合入三品者量減三考入五品者量減兩考仍待考足日聽敘其合選人與減一選禮奉郊禋任親殿省忠勞旣竭甄錄宜優內行事官三品已上更賜爵一級四品已下更加一階內侍省及內坊官四品已上各賜勲五轉五品已下各賜勲三轉應從駕至

郊廟者普恩之外三品已上賜爵一級四品已下各加一階白身賜勲兩轉陳列威容肅清警衛載加寵錫用示恩私神策六軍威遠營左右金吾及皇城將士應緣大禮儀仗宿衛御樓立仗等普恩之外三品已上賜爵一級四品已下加一階仍依舊例賜物有差其神策將士應在京畿諸縣者亦各有賜物應緣大禮職掌行事官并修撰儀注及留守副留守倉庫卿等普恩之外三品已上賜爵一級四品已下各加一階要荒地遠職貢方來旣覩郊禮之盛儀須覃慶賜之殊澤鴻臚禮賓院應在城內蕃客等各有

賜物諸道知上都進奏院在城各賜勲三轉應緣大禮四方進奏䟽及賀官各賜勲三轉藝術所資優假宜及況因大賚當給新恩翰林待詔供奉并諸色直見任及前資并員外試官三品已上賜爵一級四品已下各加一階無官者賜勲兩轉爰執豆籩克恭薦饗或贊引叶於義矩或祗飾奉其事功心畢幹勤理當褒獎郊廟行事齋郎減二年勞室長掌座禮生贊者減一年勞無勞可減者便放出身崇元館行事學生及齋郎禮生番考已滿所司緣大禮卻追入行事各減一選國子監學生陪位者賜勲一轉中書

門下儀制官各加一階應緣祇供作官直司長上諸州行
綱考典兩縣耆壽諸色番役當上在城并量留十月番者
各賜勲兩轉飛龍閑廐宮苑典引掌扇內園總監裁接少
府將作內作中尚武德軍器內外弓箭庫等諸司諸使下
白身人及無品直司定額長上雜匠巧兒黃衣長上監門
直長雜仗三衛七色引駕細引執扇角手弩手曠騎武士
天文觀生厯生漏生典鼓典鐘工人樂人主衣主膳主酪
典食胡食手宰手掌閑幕士御士醫工獸醫門僕藥僮御
書手楷書手典書流外行署等各賜勲兩轉夫務仁壽莫

若敬耆老厚風俗莫若勸名節天下百姓婦人年九十已上各賜米五石絹兩匹綿一屯羊酒有差版授下州刺史郡君八十已上各賜米三石絹兩匹版授上佐縣君孝子順孫義夫節婦旌表門閭終身勿事先已旌表者量加優卹並委令長賚米帛就家宣賜訖具名申本道一時聞奏極天而峻旣多鎮定之功赴海不窮且有朝宗之義五岳四瀆宜令本州刺史備禮致祭大報之德咸秩當行常祀雖定於歲時徧祭因宜乎柴燎載慕前王之令德復想古人之義風名山大川自古聖帝明王忠臣烈士各令所在

以禮致祭亡命山澤挾藏軍器百日不首復罪如初赦書
有所不該者所司具作條例聞奏敢以赦前事相告言者
以其罪罪之赦書日行五百里布告天下咸使聞知主者
施行

開成改元赦文

朕以寡昧祇奉昌圖兢業爲心不敢自怠庶乎播祖宗之
光烈致區宇之康平推誠不疑惟才是用豈謂凶姦背德
宗社將危中外叶謀咸加顯戮知人則哲實在帝而猶難
罪已興懷誠爲君之不易緬慚古理良用惕然是用因元

正御正殿先明首罪仍布鴻恩王守澄累朝獎任久掌禁軍忠力雖多愆誤難掩交通雜類延進奸邪專弄威權蠹害時政鄭注李訓因緣引見忝竊恩榮二三舊臣誣陷非罪成予寡昧抑有其由遂使姦惡構連竊起前殿王涯賈餗舒元興李訓宰輔股肱叶謀不軌王璠郭行餘節將在京率兵上殿羅立言李孝本紀綱臺府深入領徒韓約誘金吾衛兵立成嚮背魏逢驛騎來往鄭注自出成師將相通謀情狀咸具上天降祐氛祲已清討其本因已正刑辟王守澄旣已云亡難議深責自特進已下官爵及實封並

宜削奪禍已終於既往恩宜覃於有截可大赦天下宜改
太和十年爲開成元年自正月一日昧爽已前大辟罪已
下罪無輕重常赦所不原咸赦除之其左降官量移復資
及才用有足稱者中書門下處分貶流人中元勅不許量
移及終身勿齒者並與量移其去年應緣朋黨連累並十
一月二十一日坐罪流貶者不在此限其身亡伏法者委
所在州府量給棺殮任所親收葬制服其戶部度支鹽鐵
應有諸色欠負太和五年已前者並放免諸道賀正端午
降誕賀冬進奉起今權停三年其錢充紐放百姓兩稅所

在除藥物口味茶果外不得輒有進獻百司及諸道應宣
索制造一物已上者並停三年京畿百姓兩稅已下凡一
歲之內徵取者并百官職田並全放一年其京兆府一年
所支用錢物斛斗草等並勒鹽鐵使以開成元年直進綾
絹充還同州河中絳州去年旱歉賦斂不登宜放開成元
年夏青苗錢同州賜雜穀六萬石河中絳州共賜十萬石
委度支戶部以見貯粟麥充賜三省九列御史臺選黜陟
使十人視問風俗進賢退不肖興行新制務令通流天下
戎鎮文武帶憲官者解補進退並須奏聞其邊州令制譯

語學官常令教習以達異意内外文武官及諸色人任上封事極言得失有裨時政者必加升擢待以不次其有藏器候時隱身岩穴奇節獨行可激風俗者委常參官及所在長吏各以名聞文武之道合而兼濟勲臣子弟有能修詞務學應進士明經及通諸科者委有司先加獎引河朔節將以州縣歸國者有張茂昭田宏正程權各與一子官子弟堪任使者委中書門下量加引用應内外文武官進階加爵有差

華嚴四祖清涼國師像贊

朕觀法界曠聞無垠應緣成事允用虛根清涼國師體象
啟門奄有法界我祖聿尊教融海嶽恩廓乾坤首相二疏
拔擢幽昏間氣斯來拱承佛日四海光凝九州慶溢敞今
仙門奪古賢席大手名曹橫經請益仍師巨休保余遐厯
爰抒穎毫式揚茂實真空罔盡機就而駕白月虛秋清風
適夏妙有不遷緣息而化邈爾羽儀煥乎精舍